



EKONOMIAREN GARAPEN, JASANGARRITASUN ETA
INGURUMEN SAILA
Ingurumen Jasangarritasuneko Sailburuordetza
Ingurumen Kalitatearen eta Ekonomia Zirkularraren Zuzendaritza

DEPARTAMENTO DE DESARROLLO ECONOMICO
SOSTENIBILIDAD Y MEDIO AMBIENTE
Viceconsejería de Sostenibilidad Ambiental
Dirección de Calidad Ambiental y Economía Circular

Ebazpena, 2021eko ekainaren 15ekoa, Ingurumen Kalitatearen eta Ekonomia Zirkularraren zuzendariarena, zeinaren bidez formulatzen baita Andoingo Hiri Antolamenduko Plan Orokorraren Aldaketaren eta 56.1 egikaritze-unitatearen antolamendu xehatuaren ingurumen-azterketa estrategikoaren irismen-dokumentua.

AURREKARIAK

2021eko maiatzaren 24an, Andoingo Udalak eskabide bat egin zuen Eusko Jaurlaritzako Ingurumen Kalitatearen eta Ekonomia Zirkularraren Zuzendaritzaren aurrean, Andoingo Hiri Antolamenduko Plan Orokorraren Aldaketaren eta 56.1 egikaritze-unitatearen antolamendu xehatuaren ingurumen-azterketa estrategikoaren irismen-dokumentua eman zedin, Euskal Herriko ingurugiroa babesteari buruzko otsailaren 27ko 3/1998 Lege Orokorrarekin eta Ingurumen-ebaluazioari buruzko abenduaren 9ko 21/2013 Legeari jarraikiz.

Eskabidearekin batera hainbat dokumentu erantsi ziren, tartean, planaren zirriborroa, legeria sektorialean eskatzen den dokumentazioa eta hasierako dokumentu estrategikoa, honako hauetan ezarritako edukiarekin: abenduaren 9ko 21/2013 Legearen 16. eta 18. artikulua, eta Planen eta programen ebaluazio estrategikoaren prozedura arautzeko urriaren 16ko 211/2012 Dekretuaren 8. artikulua.

Ingurumen-organoak kontsulta-izapidea egin zuen, halaxe zehazten baita abenduaren 9ko 21/2013 Legearen 19. artikuluan eta urriaren 16ko 211/2012 Dekretuaren 9. artikuluan. Horien emaitza espedientean dago jasota. Era berean, izapidearen hasieraren berri eman zitzaion Andoingo Udalari.

Halaber, espedientean jasota dagoen dokumentazioa eskuragarri jarri zen Ekonomiaren Garapen, Jasangarritasun eta Ingurumen Sailaren webgunean, horretan interesa zuen orok aukera izan zezan ingurumen-arloan egoki iriztitako oharrak egiteko.

Jasotako txostenak aztertu ondoren, egiaztatu zen ingurumen-organoak bazituela behar beste judizio-elementu ingurumen-azterketa estrategikoaren irismen-dokumentua egiteko, abenduaren 9ko 21/2013 Legeak 19. artikuluan dionaren arabera.

ZUZENBIDEKO OINARRIAK

Ingurumen Ebaluazioari buruzko abenduaren 9ko 21/2013 Legearen 1. artikuluan xedatutakoaren arabera, lege horren xedea da planen ingurumen-ebaluazioa arautuko duten oinarririk ezartzea, plan horiek ingurumenaren ondorio adierazgarriak izan ditzaketenean; horretarako, ingurumenaren babes-maila handia bermatuko da, garapen jasangarria sustatzea helburu hartuta.

Halaber, Euskal Herriko ingurugiroa babesteko otsailaren 27ko 3/1998 Lege Orokorraren 42. artikuluan arabera, ingurumen-inpaktuen ebaluazioek egoki bermatu beharko dute, besteak beste, helburu hau betetzen dela: hautabide egokienak hautatu ahal izateko, plangintza-prozesuaren lehen faseetan egingo dela ingurumenaren gaineko eraginei buruzko azterketa,

Donostia kalea 1 - 01010 Vitoria-Gasteiz



betiere, kontuan izanik jardueren ondoriozko eragin metatzaile eta sinergikoak.

Abenduaren 9ko 21/2013 Legearen 6.1.a) artikuluan ezarritakoaren arabera, ingurumen-ebaluazio estrategiko arrunta egingo zaie planei eta programei, baita haien aldaketei ere, baldin eta administrazio publiko batek hartzen edo onartzen baditu eta legezko edo arauzko xedapen batek aginduta egiten eta onartzen badira, ingurumen-inpaktua ebaluatu behar zaien proiektuak etorkizunean baimentzeko esparrua zehazten dutenean eta ur-baliabideak kudeatzeko direnean.

Abenduaren 9ko 21/2013 Legeak xedatzen duenez, plan baten ohiko ingurumen-ebaluazioa hasteko, beharrezkoa da ingurumen-organoak ingurumen-azterketa estrategikoaren irismena zehaztea, eraginpeko administrazio publikoei eta interesdunei kontsulta egin ostean.

Arau horrek 18.1. artikuluan xedatzen ditu hasiera-eskabideari erantsi beharreko dokumentuak, eta, abenduaren 9ko 21/2013 Legeari aurka egiten ez zaionean, urriaren 16ko 211/2012 Dekretuaren 8. artikulua zabaldu eta osatzen du hasierako dokumentu horri erantsi beharrekoaren edukia.

Amaitzeko, ingurumen-azterketa estrategikoaren irismena zehazte aldera, aintzat hartu dira abenduaren 9ko 21/2013 Legeak IV. eranskinean jasotako eskakizunak, ingurumen-azterketa estrategikoaren edukiari buruzkoak, bai eta urriaren 16ko 211/2012 Dekretuak I. eta II. eranskinetan jasotakoak ere, erreferentziako dokumentuaren edukiari buruzkoak eta ingurumen-jasangarritasunari buruzko txostenaren edukiari buruzkoak, hurrenez hurren.

Orain arte ezarritakoari jarraikiz, espedienteko txostenak aztertu dira, eta honako hauek guztiak ikusi dira: Euskal Herriko Ingurugiroa Babesteko otsailaren 27ko 3/1998 Lege Orokorra; Ingurumen Ebaluazioari buruzko abenduaren 9ko 21/2013 Legea; planen eta programen ingurumen-ebaluazio estrategikoaren prozedura arautzen duen urriaren 16ko 211/2012 Dekretua; Ekonomiaren Garapen, Jasangarritasun eta Ingurumen Sailaren egitura organiko eta funtzionala ezartzen duen otsailaren 23ko 68/2021 Dekretua; Administrazio Publikoen Administrazio Prozedura Erkidearen urriaren 1eko 39/2015 Legea; Sektore Publikoaren Araubide Juridikoari buruzko urriaren 1eko 40/2015 Legea, eta aplikatzekoa den gainerako araudia. Horiek horrela, bada, honako hau

EBAZTEN DUT:

Lehenengoa. — Andoingo Hiri Antolamendurako Plan Orokorren Aldaketaren eta 56.1 egikaritze-unitatearen antolamendu xehatuaren ingurumen-azterlan estrategikoaren irismenari buruzko dokumentua ematea, ingurumen-ondorioetarako soilik eta honako baldintza hauen arabera:

1. Planaren xedea eta ebaluazio-prozesuaren irismena

Andoingo Hiri Antolamenduko Plan Orokorren Aldaketak (hemendik aurrera, HAPOren aldaketa) eta 56.1 egikaritze-unitatearen antolamendu xehatuak hirigintza-eremu berri bat mugatzen du Leizotz auzoan, Urnieta udalerrriaren mugakide den gunen batean, 56 Urkiondo izeneko Hirigintza Jarduerarako Eremuan. Eremua, 21.461 m²-koa da lursail hauek ditu: 11. poligonoko (56.1 egikaritze-unitatea) 58. eta 59. katastro-lurzatiak —Urkiondo Ekolur SL enpresaren jabetzakoak— eta beste jabe baten lurzati txiki bat (56.2 egikaritze-unitatea), zeinaren lurren zatirik handiena Urnietan baitago eta Saletxeberri eremuaren parte baita — hurrengo urteetan garatu beharrekoa berau—.

Zehazki, Aldaketaren eraginpeko 56.1 egikaritze-unitateak urbanizaturiko bi behe-plataforma barne hartzen ditu— Urkiondo Ekolur SL enpresaren finka pribatukoak—: behekoena industria-eta inausketa-zura tratatzeko eta birziklatzeko erabiltzen da gaur egun (zura metatu, birrindu, bahetu eta zurezko materiala eta zur-hondarrak bidali) , eta bestea, berriz, mintegi-jarduerarako, edukiontzitako ornamentazio- eta baso-landareak ekoizteko.

HAPOn Aldaketaren helburua honako hau da: gaur egun indarrean dagoen Andoaingo Hiri Antolamenduko Plan Orokorra (2011ko maiatzaren 19an onetsia behin betiko; 2011ko ekainaren 10eko Gipuzkoako Aldizkari Ofiziala, 110. zk.) lurzoru urbanizaezin gisa sailkatutako lurzoru sailkapena aldatzea eta «B. Jarduera ekonomikoko eremuak» kalifikazio orokorarekin lurzoru urbanizagarri bihurtzea, bai eta 56.1 egikaritze-unitatearen antolamendu xehatua zehaztea ere, gaur egun Urkiondo Ekolur SL enpresak bertan gauzatzen duen jarduera (industria-eta inausketa-zuraren tratamendua: zurezko materiala bildu, birrindu, bahetu eta igortzea) zabaltzeko (eraikuntzako eta eraispeneko hondakinen kudeaketa).

HAPOn Aldaketan honela zehazten dira 56.1 egikaritze-unitatearen antolamendu-parametroak:

- Zerbitzu-azpiegituren lurzatiak bi plataforma ditu, behekoa eta goikoa, zura tratatzeko eta hondakin geldoak tratatzeko eremurako (13.355 m²). Oro har, planteatzen diren eraikinek 4.320 m²-ko okupazioa eta 5.160 m²(t)-ko eraikigarritasuna dute.

Beheko plataforma (kota: 106) osorik kontserbatu eta eraikin berriarekin (E6) handituko da. Bertan, goiko plataformako lursailen zati bat induskatuko da.

Zuraren tratamendurako gunean (ekialdean), existitzen den bi solairuko eraikina (E1) finkatu da. Gune horretan bulegoak, biltegia eta jarduerarako zerbitzuak eta teilapeak (E2 eta E3) daude (hainbat instalazio eta/edo material-biltegi hartzen dituzte horiek), 1.300 m²-ko azalerarekin eta 1.475 m²(t)-ko eraikigarritasunarekin.

Hondakinak tratatzeko eremuan bi eraikin berri (E4 bulegoak eta E6 biltegia) eta teilape bat (E5) planteatzen dira jarduera berrirako, oinplanoko 3.020 m²-ko azalerarekin eta 3.685 m²(t)-ko eraikigarritasunarekin. Bi solairuko biltegia (E6) egungo goiko plataformaren zati baten gainean dago, eta beheko plataformaren kotaraino (10.500 m³) induskatuko da.

Goiko plataformari dagokionez, haren zati bat (kota: 110) kontserbatu egingo da; gune hori sarbidearen ondoan dago, 80.000 litroko ur-biltegia dagoen lekuan, eta mintegiak ureztatzeko eta hondakingunea hornitzeko balio du.

- Bideei dagokienez, sarbide orokorra aldatu egingo da 51 Antzizu izeneko Hirigintzarako Jarduera Eremuaren mugakide den eremuan (eremuaren iparraldeko eta mendebaldeko mugak) jarduera ekonomikoak finkatzeko egingo den jarduketaren ondorioz. Bide horrek Urkiondorako sarbide orokorarekin duen elkargunetik aurrera, igaro eta plataforma guztiak lotzen dituen tartea hobetu eta zabaldu egingo da, eta egungo malda-ezaugarriei eutsi egingo zaie, ezinezkoa baita horiek aldatzea. Bide propioa da eta bi jardueretarako sarbidea ematen du, gaur egun dauden bezalaxe: batetik, zurezko hondakinen kudeaketa; bestetik, mintegia. Bide osoa pribatua da eta 1.133 m²-ko azalera du eremuan.
- Plataformen ingurunea eta dauden plataformen eta Antzizutik egin beharreko bide berriaren arteko ezpondak gune libre pribatuetarako (3.395 m²) eta publikoetarako (2.753 m²) erabiliko dira; zehazki, 6.148 m²-ko azalera izango dute gutzira.

2. Aplikatzeko diren ingurumen-helburu estrategikoak eta jasangarritasuneko printzipioak eta irizpideak

Plana egiteko funtsezko oinarritzat hartuko dira 2020ko IV. Ingurumen Esparru Programaren helburu estrategikoak eta jarduketa-ildoak. Horrez gain, arau hauetan bildutako irizpideak jaso beharko dira: Euskal Herriko ingurugiroa babesteari buruzko otsailaren 27ko 3/1998 Lege Orokorra; Planen eta programen ingurumenaren gaineko eraginaren ebaluazio estrategikoa egiteko prozedura arautzen duen urriaren 16ko 211/2012 Dekretua; eta Euskal Autonomia Erkidegoko Natura Kontserbatzeko Legearen testuategina onartzen duen apirilaren 15eko 1/2014 Legegintzako Dekretua.

Era berean, ingurumena babesteko, planari aplikagarri zaizkion lurralde-antolamenduko planetan eta plan sektorialetan finkatutako irizpide, helburu eta zehaztapenak hartuko dira kontuan.

Zehazki, Plana zuzentzeko, garapen jasangarriko honako printzipio hauek hartu beharko dira kontuan:

- a) Lurzorua zentzuz eta era intentsiboan erabiltzea eta lehendik ere artifizialdurik dauden lurzoruen erabilera intentsiboa lehenestea, balio agrologiko handiko lurzorua eta lurzoru naturala urbanizatzea ekidinez.
- b) Hiri-segregazioa, hiri-barreiadura eta mugikortasun indusiatua saihestea irisgarritasuna garatuta, lurzoru-erabilerak eta mugikortasunak modu integratuan planifikatuz eta hiri-egitura dentsu, trinko eta konplexuak sustatuz.
- c) Lurzoruaren zigilatzea murriztea, lurzorua jasangarritasun handiagoz erabiliz eta ahal beste eginkizuni euts diezaion sustatuz.
- d) Habitatak eta espezieak, natura-ingurumena eta konektagarritasun ekologikoa zaintzea eta hobetzea.
- e) Paisaia- eta kultura-ondarea kontserbatu eta hobetzea.
- f) Baliabide naturalen kontsumo jasangarria sustatzea: ura, energia, lurzorua eta materialak.
- g) Energia-aurrezpena, energia-efizientzia eta energia berriztagarrien erabilera sustatzea.
- h) Aire garbia bermatzea, bai eta zarata eta argi-kutsadura handien mende bizi diren biztanleen kopurua murriztea ere.
- i) Klima-aldaketaren aurreko kalteberatasuna gutxitzen laguntzea, kaltea apaltzeko neurriak eta aldaketara egokitzeko neurriak integratuz.
- j) Arrisku naturalak gutxitzea.
- k) Lurzoru kutsatuaren kudeaketa hobetzea, berme juridikoa eta eragileen nahiz lurzoruaren erabiltzaile potentzialen jardura indartuta.

3. Esparru geografikoa eta ingurumen-arlo garrantzitsuak

56 Hirigintzarako Jarduera Eremuak 21.462 m²-ko azalera du eta Andoaingo Leizotz auzoan kokatuta dago, Urnietako udalerraren mugakide den gune batean. Iparraldeko, mendebaldeko eta hegoaldeko mugetan, hiri-lurzoruak eta lurzoru urbanizagarriak ditu mugakide: batetik, Andoaingo Leizotz industria-eremua eta 51 Antzizu izeneko Hirigintzarako Jarduera Eremua, eta, bestetik, Urnietako 29 Saletxeberri Hirigintzarako Jarduera Eremua. Ekialdeko mugan, berriz, inguruko baserriei lotutako lurzoru urbanizaezineko lurra daude, bai eta Urkiondo Ekolur SL enpresaren landare-mintegia bera ere, zeina abian baitago bete-betean gaur egun.

Eremua lurzoru urbanizaezin gisa sailkatuta dago indarrean dagoen plangintzan, eta D.4 zona gisa kalifikatzen da, nekazaritzako, abeltzaintzako eta landazabaleko landa-eremutzat. Nekazaritza eta Basozaintzako Lurralde Plan Sektorialaren arabera, eremuaren zatirik handienak «Nekazaritza nahiz Abeltzaintzako eta Landazabalekoa, Balio Estrategiko Handia» sailkapena du, eta gainerakoak, berriz, «Nekazaritza nahiz Abeltzaintzako eta Landazabalekoa, Trantsizioko Landa Paisaia» sailkapena.

Hala ere, eremuaren zati handiena (56.1 egikaritze-unitatea) urbanizatuta eta bi plataformatan antolatuta dago gaur egun. Batetik, eraikin bat eta teilapeak daude, industria- eta inausketa-zura tratatzeko eta birziklatzeko, eta, bestetik, edukiontzietan ornamentazio- eta baso-landareak ekoizteko berotegiak. 56.2 egikaritze-unitatea belardi baten zati txiki bati dagokio.

56.1 egikaritze-unitatean, bestalde, plataformen eta bideen arteko ezpondetan baino ez dago landaredia. Landaredi-masa horiek hostozabalen hainbat espeziez osatuta daude, besteak beste platano arruntak, urkiak, haltzak, lizarrak, sahatsak eta gaztainondoak. Bestalde, 56.2 egikaritze-unitatea Batasunaren intereseko 6510 habitata da, altitude txikiko sega-belardi pobre deritzona (*Alopecurus pratensis*, *Sanguisorba officinalis*).

Planaren eremua ez da Natura 2000 Sareko edo EAeko Naturagune Babestuen Sareko eremua, ez eta EAeko Korridore Ekologikoen Sareko egiturazko elementua ere. Ereduaren barnean ez dago interes geologikoko tokirik. Eremuan ez dago ur-ibilgurik eta ez dago intereseko faunarik identifikatuta. Halaber, katalogatutako edo katalogatzeko proposatutako ondare-elementurik ere ez dago.

Ez dago jasota eremu horretan lurzoria kutsa dezaketen jarduerak izan dituzten edo dituzten lurzoruen inbentarioan jasotako lurzatirik. Hala ere, eremuaren hegoaldeko oso gertu Urkiondoko Zabortegia izeneko lurzati dago, 20009-00020 kodea duena eta Urkiondo Ekolur SL enpresaren instalazioetako plataformak eraikitze erabiltzen diren betelantarako materialei dagokiona.

Ez dago bestelako ingurumen-arrisku nabarmenik eremuan. Materialen batez besteko iragazkortasuna kontuan izanik eta eremu horretan intereseko akuiferorik ez dagoela jakinda, eremuko akuiferoen kutsaduragatiko kalteberatasun oso txikia dago. Ez dago uholde-arriskurik, ezta higadura-arriskurik ere.

Zaratari dagokionez, zarata-iturri nagusiak ibilgailuen trafikotik (A-15, Gudari etorbidea) eta industriatik datoz. Gipuzkoako Foru Aldundiaren Zarataren Mapa Estrategikoen arabera (2017ko ekaina), HAPOren Aldaketaren eremua A-15 errepidearen eraginpeko eremuaren barnean dago. Bestalde, aipatu beharrekoa da Andoaingo udalerririk Zarataren Mapa bat duela (2014ko abendua); Andoaingo Zarataren Maparen arabera, eguneko eta arratsaldeko zarata-mailen tarteak 55-60 dB(A) da; gauean, ordea 50 dB(A) baino txikiagoak dira zarata-mailak.

4. Jarduketak egiteko eremu desegokiak.

Planaren xede den eremuan ez da hauteman jarduketak egiteko desegokia den eremurik, betiere ingurumen-araudi aplikagarria betetzen bada, batik bat, honako gai hauei buruz: naturaren kontserbazioa, lurzoru kutsatuak eta kutsadura akustikoa.

5. Aurretiaz egindako kontsultei emandako erantzunen ingurumen-azterketa laburra.

- Eraginpeko administrazio publikoei eta interesdunei egindako kontsulten izapidean jasotako txostenen arabera, ez da jaso adieraztea merezi duen ingurumen-alderdi garrantzitsurik.

6. Ingurumen-azterketa estrategikoan kontuan hartu beharreko funtsezko alderdien definizioa eta irismena.

HAPOren Aldaketak (aurrerantzean, Plana) indarreko HAPOan ezarritakoak aldatzen dituzten zehaztapen jakin batzuk jasotzen ditu; halaber, eremuaren antolamendu xehatua barne hartzen du. Beraz, kasu honetan egingo den ingurumen-ebaluazioa jarduketa-proposamen berrietan aurreikusitako antolamendu xehatuaren efektu espezifikoei arduratuko da.

Ingurumen-azterketa estrategikoak abenduaren 9ko 21/2013 Legearen IV. eranskinean ezarritako gutxieneko edukia izan beharko du, eta haren osagarri erabiliko da halaber Planen eta programen ingurumenaren gaineko eraginaren ebaluazio estrategikoa egiteko prozedura arautzen duen urriaren 16ko 211/2012 Dekretuak II. eranskinean jasotakoa.

Aurrekoarekin bat etorritik, garatuko diren apartatuek honako eskema metodologiko honi jarraitu beharko diote:

1. Proposatutako planaren deskribapena
 - 1.1. Plangintzaren esparrua eta helburuak
 - 1.2. Planaren irismena, edukia eta garapena
 - 1.3. Plangintza-alternatibak
2. Ingurumenaren ezaugarriak zehaztea
 - 2.1. Ingurumen-egoeraren deskribapena
 - 2.2. Laburpena: ingurumen-alderdi garrantzitsuak
3. Ingurumen-ondorioak
4. Prebentzio, zuzenketa eta konpentsaziorako neurriak
5. Ingurumena zaintzeko programa
6. Ingurumen-laburpena
7. Laburpen ez-teknikoa

Ebaluatzeko den dokumentuaren ezaugarriak direla eta, uste dugu ingurumen-azterketa estrategikoak (aurrerantzean, Azterketa) hainbat alderdi landu behar dituela ahalik eta zabalago eta xeheago; honako hauek, zehazki:

6.1. Planaren deskribapena

Deskribatuko da zer alderdik konfiguratzen duten plana, eta argi eta garbi identifikatuko da plana gauzatzeak etorkizunean eragin ditzakeen ekintzetatik zeinek izan ditzaketen ondorio kaltegarriak ingurumenean. Hori guztia, honako apartatu hauetan adierazitako egitura eta xehetasunekin:



6.1.1. Plangintzaren esparrua eta helburuak

a. Azterketan, laburpen txiki bat jasoko da planarekin lortu nahi diren helburu zehatzei buruz. Azterlanak era espezifikoan justifikatu beharko du nola hartu diren kontuan Planaren elaborazioa egitean Ebazpen honetako 2. apartatuan ingurumena babesteko jaso diren helburuak eta printzipio eta irizpide jasagarriak.

b. Hierarkian Plana baino goragoko mailan dauden planak edo programak identifikatuko dira. Azaletik deskribatuko dira planaren xedearekin edo esparruarekin zerikusia duten plan edo programa horien zehaztapenak eta aurreikuspenak, baita ingurumena babesteko planari aplikatzen zaizkion irizpide, helburu eta zehaztapenak ere. Zehaztu egin beharko da zer erreferentzia eta data duten hierarkian gainerik dauden plan edo programen onespene-egintzek, eta zehaztuko da ea plan edo programa horiek ingurumen-ebaluazio estrategikoaren mende jarri diren.

c. Hala badagokio, adierazi beharko da zer irizpide eta zehaztapen ezarri diren hierarkiaz planaren gainerik dauden planen ingurumen-adierazpen estrategikoan, baita plana garatzeko beste tresna batzuetan ezarritakoak ere, baldin eta ebaluatu beharreko planaren eremuari edo xedeari aplikatzekoak badira. Ingurumen-adierazpen estrategikoen erreferentzia aurkeztuko da, zehaztuta zer aldizkari ofizialetan argitaratu diren, eta kontsulta-gunerako esteka txertatuta.

d. Arauetan eta Planarekin hierarkia-loturarik ez duten bestelako planetan edo programetan ezarritako ingurumen-babeseko irizpideak, helburuak eta zehaztapenak xehatuko dira, aplikatu behar badira.

Zehazki, eta beste batzuen artean, honako plan eta arau hauek hartuko dira kontuan:

- EAEko Lurralde Antolamenduaren Gidalerroak (LAG).
- Donostiako Eremu Funtzionaleko Lurralde-Plan Partziala (Donostialdea-Bidasoa Beherea)
- Lurzorua kutsatzea saihestu eta kutsatutakoa garbitzeko ekainaren 25eko 4/2015 Legearen 23. eta 31.4 artikulak.
- 213/2012 Dekretua, urriaren 16koa, Euskal Autonomia Erkidegoko hots-kutsadurari buruzkoa.

6.1.2. Planaren irismena, edukia eta garapena

a.- Planaren irismenak ezin hobeto definituta geratu behar du. Planaren aplikazioaren ondorioz planteatzen diren ekintzen deskribapen zehatz bat garatuko du azterlanak, eta haiek lotura izan beharko dute planak eragindako eremuan indarrean den hirigintza-antolamenduaren aldean dakartzan aldaketekin edo xehakapenekin, baldin eta ingurumenean ondorio kaltegarri nabarmenak izan baditzakete, betiere eremuaren garapenerako beharrezkoak diren jarduketa guztiak aintzat hartuta.

b. Planeko proposamenak gauzatzeko erabiliko diren proiektu eta jarduketan ezaugarriak buruzko aurreikuspen bat egingo da.

Ildo horretan, hondakinak kudeatzeko jarduera berria zertan datzan deskribatu beharko da.



c. Ingurumenean eragina izan dezaketen Planeko ekintzak deskribatu eta kokatuko dira, eta garrantzi handienetik txikienera hierarkizatuko dira, kontuan hartuta haien kokapen zehatza, izaera, magnitudea eta baliabide naturalen kontsumoa. Horrela deskribatutako plan-ekintza bakoitzari kode bat esleituko zaio. Kode hori azterketaren hurrengo apartatuetan erabiliko da, baldin eta aipatu behar bada.

d. Plana onartu ondoren, haren garapena zehaztu eta plangintzaren geroagoko faseak aipatuko dira, baita planaren zehaztapenak ezartzeko tresnak ere. Era berean, aurreikusiko da garapen-tresna eta/edo proiektu horiek ingurumen-ebaluazioaren mende egon daitezkeela.

e. Nolanahi ere, Plana garatzeko zenbat denbora aurreikusten den erantsiko da, eta, hala badagokio, aurreko apartatuan azaldutako ekintzetarako denbora-aurreikuspena zehaztuko da.

F. Epigrafe honetan biltzen den informazioa kartografikoki islatuko da dagokion eskalan, eta lurraldearen erabilera islatuko du, baita ingurumen-ondorio nabarmenak ekar ditzaketen Planaren aurreikuspen eta jarduketak ere. Informazio kartografikoa atxiki beharko da, gutxienez hauek jasoko dituen: eremuaren mugaketa eta jarduketaren kokapena, pdf eta shape formatuetan.

6.1.3. Plangintza-alternatibak

a. Azaletik deskribatuko dira plana emateko prozesuan kontuan hartu diren aukera guztiak. Aukera horiek bideragarriak izan behar dute teknikoki eta ingurumenaren aldetik, eta hauei buruzkoak izan daitezke: kokalekua, garapen teknikoa, aldi baterako garapena, kudeaketa, antolamendua, baliabide naturalen erabilera edo beste edozein alderdi. Era berean, 0. aukera edo esku ez hartzeko aukera ere hartuko da kontuan; kasu horretan, honako hau izango da erreferentzia: jarduketa-eremuaren alderdi garrantzitsuek izan dezaketen bilakaera Planaren proposamenak aplikatu ezean.

b. Aukera horien irismena deskribatuko da, eta zehaztuko da zer alde dagoen aukera bakoitzaren arabera Planean jasotako proiektuen eta ekintzen artean, 6.1.2.b apartatuan deskribatutako proiektuekin eta 6.1.2.c apartatuan deskribatutako ekintzekin alderatuta.

c. Laburpen bat ere jasoko da azaltzeko zergatik baztertu diren aztertutako plangintza-alternatibak eta zergatik onartu den azkenean proposatutako alternatiba.

d. Aztertutako alternatibak kartografikoki jasoko dira.

6.2. Ingurumenaren ezaugarriak zehaztea

Azterlanak deskribatu beharko ditu zein diren ingurumenak egun duen egoeraren ezaugarri nagusiak Planak eragiten duen eremuan. Deskribapen horretan, elementu abiotikoen eta biotikoen ezaugarriak aztertuko dira, bai elementu bakoitzaren ikuspuntu sektorialetik, bai beren interakzioen ikuspuntutik, eta ingurumenaren egungo egoeraren ikuspegi integratua emango da.

Planaren eraginpeko esparrua, antolamendu-esparru osoa izateaz gain, esparru horren ingurunerik hurbilena ere izango da, eta ingurune hori mugatuko da planaren ekintzek ingurumen-ondorio garrantzitsuak izan ditzaketen eremuetara.

Ingurumenaren kalitatearen gaineko alderdiei buruzko informazioa azterlanetan edo bestelako erreferentzia-dokumentuetan oinarrituta dagoenean, emandako datuen iturria identifikatuko

da, eta adieraziko da zein den titulua, urtea, egilea, eta, hala badagokio, zer esteka balia daitekeen lana bere osotasunean kontsultatzeko.

Azterketak eskalako planoak jasoko ditu, ingurunearen aldagaiak islatzeko modukoak.

6.2.1. Ingurumen-egoeraren deskribapena

Honako hauek izango dira, gutxienez, aintzat hartuko diren ingurumen-alderdiak:

a. Ingurune fisikoa. Zenbait faktore hartuko dira kontuan, hala nola arroka ama eta zorupea, horien iragazkortasuna, masak eta ur-puntuak, faktore klimatikoak eta lurzoru mota. Lurzoru motari dagokionez, dituzten ezaugarriak direla-eta gaitasun agrologiko handiko modura katalogatutako lurzoruen erreferentzia aipatu beharko da.

b. Natura-ondarea. Natura- eta ekologia-intereseko elementuak jakinaraziko dira, baleude; esaterako, ibai-ibilguak, fauna- eta flora-espezie mehatxatuen banaketa-eremuak, Batasunaren intereseko lehentasunezko habitatak eta landaredia, flora eta fauna autoktonoak. Egungo elementuen kontserbazio-egoerari buruzko datuak emango dira, baita interes maila, kalteberatasuna, egungo presio eta mehatxuak ere, plana gauzatzean areagotu daitezkeenak.

c. Paisaia. Pertzepzioaren ikuspegitik interesgarria den elementurik badagoen aztertuko da.

d. Ingurumen-arriskuak eta -arazoak. Arriskuei buruz jaso ahal izan diren datu guztiak emango dira, kontuan hartuta, besteak beste, higadura-arriskua, lurpeko uren kalteberatasuna, uholde-arriskua, arrisku geoteknikoak, klima-aldaketak eragindako arriskuak edo aipatzeko moduko beste edozein ingurumen-arrisku.

e. Orobat, airearen, uraren edo lurzoruaren kalitateari dagokionez hautemandako ingurumen-arazoak deskribatuko dira, egoera akustikoa barne. Iturri kutsatzaile izan daitezkeenak identifikatuko dira.

f. Apartatu honetan, gainera, egon daitezkeen beste ingurumen-baldintzatzaile batzuk landuko dira, baldin eta planaren ingurumen-ebaluaziorako garrantzitsuak badira, hala nola mugikortasunari eta garraioari buruzko alderdiak, eremuko irisgarritasun-baldintzak, baliabide berriztagarrien eta berriztaezinen kontsumoari lotutako beharrak (ura, energia, etab.), jendea bizi den eremuen presentzia eta kaltetua izan daitekeen biztanleria eta abar.

6.2.2. Laburpena: ingurumen-alderdi garrantzitsuak

Aurreko apartatuan azaldutako deskribapen eta datuak oinarri hartuta, ingurumenaren egungo egoera aztertuko da Planaren eraginpeko esparruan, eta labur-labur jasoko da zein diren planeko jarduketan ondoriozko elementu, prozesu, arazo eta ingurumen-arrisku garrantzitsuenak ingurumen-ebaluazioko prozesuan. Arreta jarri beharko zaie ingurumenaren ikuspegitik interesgarriak diren esparru, elementu edo egoerei, baita eragina jasateko arriskua duten alderdiei ere; horretarako, kontuan hartuko dira planean jasota dauden jarduketan ondoriozko proiektuen eta ekintzen kokapena eta ezaugarriak.

Ingurumen-azterketa estrategikoak hauteman beharko du zer eremuk sor ditzakeen arazoak ingurumenaren ikuspegitik, eremu horiek proposamenen garapenarekin bateragarriak izan daitezen; horretarako, kontuan hartu beharko du ingurumenaren aldetik garrantzitsuak diren eremu edo elementuak daudela, besteak beste ebazpen honen 3. apartatuan aipatzen direnak.

Halaber, eremuaren ingurumen-diagnostiko zehatza egin beharko da, eremuaren harrera-gaitasuna, arrisku-guneak eta ingurune hauskor edo kalteberak ebaluatu ahal izateko.

6.3. Proposatutako planaren ingurumen-ondorioak

a. Apartatu honetan, identifikatu eta aztertuko da zer efektu izan ditzaketen planean bilduriko ekintzek 6.2 apartatuan deskribatutako ingurumen-kalitateko elementuetan, eta efektu horien ezaugarriak deskribatuko dira. Planaren ondorioak identifikatu eta horien ezaugarriak deskribatzeko, aztertuko da zer-nolako interakzioa dagoen lanean aurreikusitako ekintzen eta eragin ditzaketen ingurumen-elementuen ezaugarri espezifikoen artean, bai eta zer ingurumen-arazo eta -arrisku sortu edo areagotu daitekeen.

Ezaugarrien deskribapenean, argi eta garbi zehaztu beharko da zer-nolako ondorioak dauden, honako hauek bereizita: zeharkako ondorioak, metatze-ondorioak, ondorio sinergikoak, epe labur, ertain eta luzerako ondorioak, ondorio iraunkorrak eta aldi baterako ondorioak.

Azterketaren 6.1.2.c apartatuan identifikatutako ekintza guzti-guztien ingurumen-ondorioak deskribatuko dira, eta espresuki aipatuko da apartatu horretan ekintzei esleitutako kodea.

Hala dagokionean, zehaztu egingo da zer ondorio dakarren zenbait ekintzaren konbinazioak. Gainera, ingurumen-ondorio guzti-guztiak bereizi beharko da, baldin eta biztanleriaren, giza osasunaren edo ondasun materialen gainean ondorio kaltegarri eta nabarmenak izan baditzaie.

Deskribatutako planaren efektu bakoitzari, berriz, kode bat esleituko zaio. Kode hori azterketaren hurrengo apartatuetan erabiliko da, horren erreferentzia behar bada.

Beste alderdi batzuen artean, honako eragin hauek aztertuko dira:

- Ingurumen-azterketa estrategikoak balizko nekazaritza-eragina aztertuko du, AAEP (zehazki, Nekazaritza eta Basozaintzako Lurralde Plan Sektorialaren D dokumentuko I. eranskinean, «jardun-tresnak» izenekoa) jasotakoaren arabera.
- Hirigintza-garapenak eremuko landaredian dituen ondorioak aztertuko dira.
- Indusketek eta lur-mugimenduek eragindako ondorioak identifikatuko dira.
- Ingurumen-azterketa estrategikoan aztertuko da aurreikusi diren erabileretan zer mailatan betetzen diren 213/2012 Dekretuan ezarritako kalitate akustikoaren helburuak (213/2012 Dekretua, urriaren 16koa, Euskal Autonomia Erkidegoko kutsadura akustikoari buruzkoa). Ildo horretan, xehetasunez deskribatuko dira kalitate akustikoko helburuak betetzeko behar diren neurri zuzentzaileak.

b. Identifikatu eta kodetutako efektuak neurtzeko, honako alderdi hauek hartuko dira kontuan, besteak beste:

- Gertatzeko probabilitatea, iraupena, maiztasuna eta itzulgarritasuna.
- Efektuen larritasuna eta irismen espaziala.
- Eraginpean gera daitekeen eremuaren balioa eta kalteberatasuna, honako hauek kontuan hartuta:
 - Naturari, kulturari eta paisaiari dagokienez ezaugarri berezirik ote dagoen.

- Aurkako ingurumen-baldintzarik dagoen, airearen, uraren edo lurzoruaren kalitate-estandarrak edo muga-balioak gaindi dezakeenik.
- Planak ingurumen-arriskuak zein heinetaraino sortu edo areagotu ditzakeen.

Ahal den guztietan, efektuak edo ondoreak zenbatetsiko dira, datu neurgarriak erabilia, planean aurreikusitako jarduketak eta proiektuak gauzatzearen ondorioz deskribatu diren ingurumen-faktoreen egoera-aldaketei buruzkoak. Hala badagokio, ondorio edo efektu horien iragarpenean dagoen ziurgabetasun-maila adieraziko da.

c. Halaber, ahal den neurrian, ondorioak kartografia bidez lokalizatuko dira, eta, orobat, saiaturik da lotzen plan edo programaren gerta litezkeen faseekin.

d. Adieraziko da ea detektatutako ondorioa ekarriko duen ekintza horrek eskatzen duen beste plan eta programa batzuetan sartzea laneko zehaztapenak, eta zehaztuko da kasu bakoitzean zein den eragindako planifikazio-tresna.

e. Hala deskribatutako ingurumen-ondorioak hierarkizatu egingo dira, horien garrantzi erlatiboa nabarmentzeaz gain.

6.4. Prebentzio, zuzenketa eta konpentsaziorako neurriak

a. Apartatu horretan, deskribatuko da zer neurri aurreikusten den azterlanaren 6.3. apartatuan deskribatutako ingurumen-ondorio kaltegarriak prebenitzeko, murrizteko eta, hala badagokio, konpentsatzeko. Hartuko diren neurriek bermatu egin beharko dute ez dela ingurumen-ondorio esanguratsurik sortuko, planaren ekintzak garatzearen eta etorkizunean gauzatzearen ondorioz. Haien helburua izango da natura-baliabideak, natura- eta kultura-ondarea babestea, natura-arriskuak prebenitzea eta hautemandako ingurumen-arazoen aurrean hobetu eta egokitzea.

b. Proposatutako neurriek koherenteak izan beharko dute aurreikusitako ingurumen-ondorioekin. Neurriak deskribatu egingo dira, eta azterlaneko 6,3. apartatuan identifikatutako efektuekin —prebenitu, zuzendu edo konpentsatu nahi direnekin— lotuko dira. Bereziki, eta beste batzuen artean, honako neurri hauek zehaztuko dira:

- Eremuaren barnean Planaren garapenak zuzenean eragingo ez dion landaredia babesteko neurri espezifikoak zehaztuko dira.
- Hala badagokio, kalitate akustikoaren helburuetara iristeko behar diren neurriak ezarriko dira, EAEko hots-kutsadurari buruzko urriaren 16ko 213/2012 Dekretuaren 40. artikuluan zehaztutakoaren arabera, eta eremu akustikoak eta erabilera aurreikusiak kontuan hartuta.
- Halaber, eta kontuan izanik eremuaren inguruko lurzati batean lurzorua kutsatzeko arriskua dakarten jarduerak gauzatu direla, Planaren garapenak lurzati horri eragiten badio, Lurzorua kutsatzea saihestu eta kutsatutakoa garbitzeko ekainaren 25eko 4/2015 Legeari jarraikiz jardun beharko da.
- Orobat, planaren garapena paisaian integratzeko irizpideak zehaztuko dira; horretarako, erabili beharreko espezieak eta birlandatu beharreko azalerak ezarriko dira, eta kontuan hartuko dira Eusko Jaurlaritzako Ingurumen, Lurralde Plangintza eta Etxebizitza Sailak egindako *Lorategi eta berdegune jasangarriak diseinatze*ko eskuliburua argitalpenean jasotako gomendio eta neurriak. Alde horretatik, landareztatze- eta lorategi-lanetan ez dira inola ere erabiliko inbaditzaileak izan daitezkeen espezie aloktonoak, hala nola

Fallopia japonica, *Robinia pseudoacacia*, *Cortaderia selloana* eta abar. Horretaz gain, neurriak hartuko dira espezie horien hedapena deuseztatzeko eta saihesteko.

- Azkenik, Ingurumen-ebaluazioari buruzko abenduaren 9ko 21/2013 Legeak eskatzen duenez, ingurumen-azterketa estrategikoak barnean hartuko ditu klima-aldaketaren gaineko eragina arintzeko eta hartara egokitu ahal izateko neurriak. Xede horrekin, IHOBek egindako gida metodologiko hauek erabili ahal izango dira erreferentzia gisa: *Klima-aldaketara egokitzeko udal-programak egiteko gida*. *Udalsarea 21 lan-koadernoa* eta *Euskadiko Hirigintzaren Plangintzari buruzko eskuliburua klima-aldaketa arintzeko eta klima-aldaketara egokitzeko*.

c. Adieraziko da planaren zein zatitan txertatu diren proposatutako neurriak, eta espresuki zehaztuko da planean bildutako zein dokumentu teknikotan jaso diren neurri horiek.

d. Hala badagokio, prebentzio, zuzenketa eta konpentsaziorako neurriak proposatuko dira, horiek aplikatzea komenigarri edo egingarria denean, bai plangintzaren geroagoko fase edo etapetan, bai Plana gauzatzeko etorkizuneko proiektuetan.

e. Kostu ekonomikoren bat dakarten prebentzio eta zuzenketarako neurrien aurrekontua ere jasoko da, eta horrez gain, horiek gainbegiratzeaz arduratuko den agentea edo pertsona zein den adieraziko da.

6.5. Ingurumena zaintzeko programa

a. Azterketak ingurumena zaintzeko programa bat garatuko du, eta, bertan, Plana aplikatzeak dakartzan ondorioak berrikusteko aurreikusitako neurriak deskribatuko dira. Neurri horien helburua alderdi hauek kontrolatzea izan beharko da:

- Planak ingurumenean izan ditzakeen ondorio kaltegarriak prebenitu, murriztu edo zuzentzeko neurriak behar bezala ezartzen direla gainbegiratzea.
- Ingurumen-elementu garrantzitsuen eboluzioa zaintzea, baita plana martxan jarri aurretik zeuden ingurumen-arazoen eboluzioa ere.
- Plana gauzatzeko eragindako ingurumen-ondorioak egiaztatzea, aurreikusi gabeko eragin kaltegarriak azkar identifikatzeko eta horiek saihesteko edo zuzentzeko neurri egokiak hartu ahal izateko.
- Aztertzea ea prebentzio- eta zuzenketa-neurri osagarriak hartu behar den plana egikaritzeko aurreikusitako garapen-tresnetan eta proiektuetan.

b. Jarraipen-neurriak identifikatu egingo dira, eta neurri horiek bat etorri beharko dute azterketaren 6.4 apartatuan jasotako babes, zuzenketa eta konpentsaziorako neurriekin.

c. Ingurumena zaintzeko programak jaso beharko du zer adierazle proposatzen diren azterketan, bai eta kasu bakoitzean datuak biltzeko zer proposamen zehatz egiten den ere, aldizkakotasunari eta erabiliko diren metodoei dagokienez.

6.6. Ingurumen-laburpena

a. Ingurumen-alderdiak planean nola txertatuko diren deskribatuko da. Xehetasunez aztertuko da nola hartu diren kontuan eta nola betearazi diren azterketaren 6.1.1. apartatuan ingurumena babesteko finkatutako irizpideak, helburuak eta zehaztapenak.

b. Aztertuko da zer-nolako probabilitatea dagoen planak etorkizunean ingurumenean eragin adierazgarriak izateko, eta behar diren argudioak emango dira honako hau egiatzatze aldera: proposatutako babes, zuzenketa eta/edo konpentsaziorako neurriak planean txertatuz gero, oso arrisku txikia dagoela ondorio esanguratsu horiek gertatzeko eta, ondorioz, ez dagoela eragozpenik plana garatzeko. Ondorio hori gauzatu ahal izateko, azterketaren gainerako apartatuetan jasotako informazioei buruzko erreferentzia egokiak erabiliko dira.

6.7. Laburpen ez-teknikoa

a. Azterketak barnean hartuko du emandako informazioaren laburpen ez-tekniko bat, eta ebaluazio-prozesuan jorratutako gaietako prestakuntza espezifikorik ez duten pertsonak erraz ulertzeko moduan idatzita egon beharko du laburpen horrek.

b. Laburpen horrekin batera, gainera, egindako ebaluazioa hobeto ulertzen lagunduko duen informazio grafikoa ere erantsi beharko da; edo, bestela, informazio hori erraz eskuratzeko behar diren erreferentziak jaso beharko dira.

7. Jendaurreko informaziorako eta kontsultetarako izapideak

Urriaren 16ko 211/2012 Dekretuaren 12. artikuluan eta abenduaren 9ko 21/2013 Legearen 21. artikuluan ezarritakoaren ondorioetarako, organo sustatzaileak jendaurrean jarriko du Planaren hasierako bertsioa, baita ingurumen-azterketa estrategikoa ere, gutxienez 45 eguneko epean.

Era berean, kontuan hartuta urriaren 16ko 211/2012 Dekretuaren 12. artikulua eta abenduaren 9ko 21/2013 Legearen 22. artikulua zer xedatzen duten ukitutako administrazio publikoei eta interesdunei egin beharreko kontsultei buruz, erakunde eta pertsona interesdunen zerranda hau hartuko da kontuan:

- Kultura eta Hizkuntza Politika Saileko Kultura Ondarearen Zuzendaritza. Eusko Jaurlaritza.
- Landaren eta Itsasertzaren Garapeneko eta Europar Politiketako Zuzendaritza. Eusko Jaurlaritza.
- Osasun Saileko Osasun Publikoaren eta Adikzioen Zuzendaritza. Eusko Jaurlaritza.
- Natura Ondare eta Klima Aldaketa Zuzendaritza. Eusko Jaurlaritza.
- Gipuzkoako Foru Aldundiaren Nekazaritzako eta Lurralde Oreka Zuzendaritza Nagusia
- Kultura Zuzendaritza Nagusia. Kultura, Gazteria eta Kirol Departamentua. Gipuzkoako Foru Aldundia.
- Gipuzkoako Foru Aldundiko Bide Azpiegituretako Departamentuko Kudeaketa eta Plangintzako Zuzendaritza Nagusia.
- Gipuzkoako Ekologistak Martxan elkarteak.
- Eguzki (Eguzkizaleak Aisialdirako Elkarteak).

8. Dokumentazioa aurkezteko jarraibideak.



Ingurumen-ebaluazioari buruzko abenduaren 9ko 21/2013 Legearen 24.1 artikuluan aurreikusitakoaren arabera, organo substantiboak ingurumen-ebaluazio estrategikoaren espediente osoa igorriko dio ingurumen-organuari, honako hauek barnean hartuta: plan edo programaren azken proposamena, ingurumen-azterketa estrategikoa, informazio publikoaren eta kontsulten emaitzak, eta laburpen-dokumentu bat, plan edo programaren azken proposamenean honako alderdi hauek nola txertatu diren azaltzen duena: ingurumen-alderdiak, ingurumen-azterketa estrategikoa eta hori irismen-agirira nola egokitzen den, egindako kontsulten emaitza, eta kontsulta horiek nola hartu diren aintzat.

Ingurumen-adierazpen estrategikoa eskatzeko eta dokumentazioa entregatzeko, bete beharko dira Ekonomiaren Garapen, Jasangarritasun eta Ingurumen Sailaren webgunean horri buruz dauden jarraibideak, esteka honetan jasotzen direnak:

<https://www.euskadi.eus/informazioa/ingurumen-ebaluazio-estategikoaren-prozeduraren-tramitazioa/web01-a2inginp/eu/>

Eskabidearekin batera aurkeztu beharreko dokumentazioa gidaliburuaren arabera egin eta aurkeztu beharko da. Gidaliburua ingurumen-organoren webgunean dago eskuragarri, esteka honetan:https://www.euskadi.eus/contenidos/informacion/eia/eu_def/adjuntos/Dokumentuak-aurkezteko-GIDA.pdf

Bigarrena. -Ebazpen hau Andoaingo Udalari jakinaraztea.

Hirugarrena. -Ebazpen hau Ekonomiaren Garapen, Jasangarritasun eta Ingurumen Sailaren webgunean argitaratzeko agintzea.

Vitoria-Gasteiz, 2021eko ekainaren 15a.

Javier Aguirre Orcajo
Ingurumen Kalitatearen eta Ekonomia Zirkularraren Zuzendaria